

Awig – Awig

DAGING

MAKA BANTANG AWIG-AWIG DESA ADAT TANJUNG BUNGKAK

DESA SUMERTA KELOD

PADAGINGAN.....			1
MURDHA CITTA.....			3
SARGA	I	ARAN LAN WEWIDANGAN DESA.....	3
SARGA	II	PETITIS LAN PAMIKUKUH.....	3
SARGA	III	SUKERTA TATA PAKRAMAN.....	3
		PALET 1 Indik Pakraman.....	3
		PALET 2 Indik Prajuru.....	8
		PALET 3 Indik Kulkul	10
		PALET 4 Indik Paruman.....	11
		PALET 5 Indik Padruwen Desa.....	13
		PALET 6 Indik Sukerta Mapitegep.....	14
		PALET 7 Dusta LanBaya.....	16
SARGA	IV	SUKERTAN TATA AGAMA.....	17
		PALET 1 Indik Dewa Yadnya.....	17
		PALET 2 Indik Rsi Yadnya.....	20
		PALET 3 Indik Pitra Yadnya.....	21
		PALET 4 Indik Manusa Yadnya.....	26
		PALET 5 Indik Bhuta Yadnya.....	27
SARGA	V	SUKERTA TATA PAWONGAN.....	29
		PALET 1 Indik Pawiwahan.....	29
		PALET 2 Indik Nyapian.....	32
		PALET 3 Indik Sentana.....	34
		PALET 4 Indik Warisan.....	36

Awig – Awig

SARGA	VI	WICARA LAN PAMIDANDA.....	38
		PALET 1 Indik Wicara.....	38
		PALET 2 Indik Pamidanda.....	39
SARGA	VII	NGUWAH-NGUWUHIN AWIG-AWIG.....	41
SARGA	VIII	PAMUPUT.....	41

**AWIG-AWIG
DESA ADAT TANJUNG BUNGKAK**

MURDHA CITTA

Om Swastyastu,

Om Awighnamastu Nama Sidham,

Krama Desa Adat Tanjung Bungkak, Desa Sumerta Kelod, Kecamatan Denpasar Timur, Kota Denpasar, ngawitin ngawentenang Pesamuhan Agung ring rahina Redite Wage Wara Kerulut, penanggal ping 15 utawi Purnama Sasih kaenem Icaka warsa 1912, tanggal Masehi 2 Desember 1990, magenah ring Pura Desa, Desa Adat Tanjung Bungkak.

Malarapan saking manah suci nirmala miwah Asung Kerta Wara Nugraha Ida Sang Hyang Widhi Wasa, Krama Desa Adat Tanjung Bungkak sagalak sagilik saguluk salunglung sabayantaka mutusang ring Pesamuhan Agung gumawe Awig-Awig Desa Adat, maka sepat siku-siku pameneh, wastu kasidan prayojanan sami kabeh prasama angidep amanggeh aken tata gamaning awig-awig

Maka murdhaning pamikukuh ngarencana awig-awig puniki malarapan antuk dresta-dresta sane kantun manggeh ring sawewidangan Desa Adat Tanjung Bungkak.

Pamekas pamikukuh lan patites Pancasila, Undang-Undang Dasar 1945 tur sahanan Peraturan-Peraturan Pemerintah Republik Indonesia, tan maren manggeh kainggihan mawasta metu awig-awig sane kapidarta sakadi ring sor puniki.

Om, Shanti, Shanti, Shanti, Om.

SARGA I
ARAN LAN WEWIDANGAN DESA
Pawos 1

- 1) Desa Adat Puniki mewasta “DESA ADAT TANJUNG BUNGKAK”
- 2) Jebar lan kakuwub wewidangannya mawates nyatur desa :
 - a. Sisi wetan : Desa Adat Kesiman
 - b. Sisi kidul : Desa Adat Renon
 - c. Sisi kulon : Desa Adat Yang Batu
 - d. Sisi lor : Desa Adat Sumerta.
- 3) Kakuwub wewidangan Desane, manut dresta luwir ipun :
 - a. Pupulan karang paumahan, sinanggeh palemahan Desa Pakraman.
 - b. Setra, tegal lan sawah ring kakuwub wewidangan Desa sajabaning Desa Pakraman, sinanggeh telajakan Desa.
- 4) Manut ring Tri Lingganing Desa, kakuwub lan wewidangan luirnyane :
 - a. Utama Mandala : Tegak Kahyangan Tiga
 - b. Madya Mandala : Pupulan karang paumahan
 - c. Nista Mandala : Setra.

Pawos 2

- 1) Krama Desa Adat Tanjung Bungkak keepah dados 3 (tigang) banjar luire :
 - a. Banjar Tanjung Bungkak Kaja
 - b. Banjar Tanjung Bungkak Kelod
 - c. Banjar Sebudi.
- 2) Wates palemahan wewidangan banjar kamanggehang antuk Paruman Desa.
- 3) Manut ring munjuk lungsur cacah jiwa pawongannya pahpahan banjar rauh wewidangannya wenang karobah manut pamutus Paruman Desa.
- 4) Soang-soang banjar patut madruwe piranti-piranti pamekasnya; Bale banjar miwah kulkul.
- 5) Krama banjar wenang keepah dados tempekan manut pararem pesamuhan banjar.

Awig – Awig

Pawos 3

- 1) Soang-soang banjar wenang ngardi awig-awig miwah pararem-pararem maka pamikukuhnya.
- 2) Awig-awig miwah pararem banjar tan wenang lempas ring awig-awig miwah Pesamuhan Agung Desa Adat.
- 3) Awig-awig banjar saha taler kalingga tanganin antuk Bendesa Adat maka pamikukuh dumogi dados kalaksanayang.
- 4) Sahanan tempekan tan wenang ngardi awig-awig miwah pararem, santukan tempekan punika sinanggeh pah-pahan banjar.

SARGA II

PETITIS LAN PAMIKUKUH

Pawos 4

Desa Adat Tanjung Bungkak ngamanggehang pamikukuh minakadi :

- a. Pancasila.
- b. Undang-Undang Dasar 1945 pamekas pasal 18.
- c. Tri Hita Karana, manut tata cara Agama Hindu.
- d. Perda Nomor 6 Warsa 1986.

Pawos 5

Luir petitis Desa Adat Tanjung Bungkak :

- a. Mikukuhin miwah ngrajegang Sang Hyang Agama.
- b. Nginggilin tata prawertine me-Agama.
- c. Ngrajegang sukertan Desa saha pawongannya sakala lan niskala.
- d. Ngrajegang tata sangaskaranin pawongan, pamekas sane ngiket pakulawargan.
- e. Ngrajegang pasukertan sahanan druen Desa miwah pawongan sami.

SARGA III
SUKERTA TATA PEKRAMAN
PALET 1
INDIK PAKRAMAN
Pawos 6

- 1) Sane kabaos Krama Desa inggih punika kulawarga sane maagama Hindu, saha ngawit saking mawed.
- 2) Sajabaning punika sinanggeh tamiu.

Pawos 7

Krama Desa utawi banjar wenten 4 soroh, inggih punika :

- a. Sahanan Warga Desa sane sampun marabian patut ngawit tedun makrama.
- b. Sahanan Krama Desa sami keni ayah makadi ring sor :
 1. Ayah utama (Sulinggih lan Pemangku).
 2. Ayah Ngarep/gegem.
 3. Ayah Pengele.
 4. Ayah Balu.
 5. Ayah Ngelitik.
- c. Satunggal krama manut dudonan kulawarganya patut keni ayah sinalih tunggil :
 1. Ayah utama.
 2. Ayah ngarep.
 3. Ayah Balu, ityewamadi.
- d. Ayah ngarep sane sampun wenten sentanannya marabian wenang nyade ayahannyane kasilidihinin olih sentananya inucap.

Pawos 8

- 1) Pakulawarga ma-agama Hindu wiwitan warga Desa siosan, dados ngranjing makrama desa paradene pacang jenek mapaumahan ring wewidangan Desa Adat Tanjung Bungkak, nanging wenten wates-wates ipun :
 - a. Ngabotin tategenan Kahyangan Tiga.
 - b. Keni penanjung batu manut perarem Desa.

Awig – Awig

- c. Tan kawenangan mamendem ring setra, kadadosan maprelina abune kahanyut ka segara.
 - d. Saha upakara ring Setra lan Kahyangan Tiga.
- 2) Sang ayat ngranjing kadi ring ajeng, atur supeksa ring Kelihan Banjar sane ngewidangan genah paumahannya. Atur inucap ring ajeng kadulurin antuk ilakita saking Desa/Banjar wiwitannya ngenenin indik paukudannya saha nawur linggih manut pararem.

Pawos 9

- 1) Sahananin warga Desa sane sampun anom miwah dehe, soang-soang patut ngayah kawastanin ayah Dehe/Teruna.

Ayah Dehe/Teruna punika kapupulang ring Sekaa Teruna-Teruni (Dehe-Teruna).

- 2) Sekaa Dehe-Teruna punika patut wenten ring banjar soang-soang.

Pawos 10

- 1) Desa miwah Banjar mapeweweh laluputan ayah miwah kenan-kenan ring sang inggiling linggih utawi sang kawelas asih.
- 2) Krama Desa sane kadadosan polih mapuankid :
 - a. Sakit/metepetin.
 - b. Maleluasan.
 - c. Mayadnya.
 - d. Kapademang.
 - e. Kacandelan.

Kengin dados wantah apisan, sajawanin wenten kabebasan antuk Prajuru.

Pawos 11

- 1) Swadarmaning krama Desa luire :
 - a. Drada atuang ring Desa.
 - b. Tinut saturut ring daging awig-awig, pararem-pararem miwah gaguwet-gaguwet Desa.
 - c. Tan maren ngusahayang mangda Desane nyidayang nyujur tatujonnya kadi munggah ring pawos 5 ring ajeng.

Awig – Awig

- d. Natak panes-tis kertin Desa.
- 2) Wong Desa sinanggeh tamiu patut :
- a. Tinut ring tetiwak Desa ngenenin indik ngupadi sukertan Desane ring sakala.
 - b. Tan wenten nungkasin kertin Desa.

Pawos 12

- 1) Petiyas krama Desa luire wenang polih pangayoman prajuru manut dresta ngenenin :
- a. Sangaskara kauripannya sane mabuat, sane mastikayang iketan sulur pakulawargan.
 - b. Kasukertan miwah kasucian dewek, Parahyangan miwah karang nyane.
 - c. Kasukertan druwen nyane soang-soang.
 - d. Abaosan tur ketiwakin pamutus sahanan wicarannya.
 - e. Nyarengin paruman Desa, sahe wenang mastikayang pamutus.
 - f. Kengin dadi ring sor :
 - 1. Kapuankid.
 - 2. Nyade mapiteges ngamademang ayah risampun mayusa 70 warsa.
 - 3. Nyade utawi nyusukin tur sane kawenangan risampun manggeh Dehe-Teruna utawi mrasidayang nganutin krama.
 - 4. Mutug ayah antuk arta brana santukan kapialangan.
 - 5. Mutug ayah antuk arta brana santukan makarya ring dura desa.
 - 6. Yening sinalih tunggil kasudi antuk sang angawerat utawi maleluwasan.
- 2) Sahanan krama Desa rawuhing sang sinanggeh tamiu, wenang polih pangayoman ngamanggehang kasukertan raga, agama saha druwenya soang-soang.

Pawos 13

- 1) Sahanan krama sane ngarobang utawi ngajak anak siosan, lempas ring drestaning pakulawarga umpami : ngajak wong duduk-dudukan, patut atur uning Kelihan Banjar.
- 2) Pesadok ring ajeng kadulurin Antuk keterangan pastika, ngenanin indik liggih, arta brana miwah tategenan krama kalih sang kaajak inucap.

Awig – Awig

- 3) Kramane sane ngerob, patut nanggung sumakata negenang lampah sang kaajak arepa ring sukertan Desa.
- 4) Kelihan banjare ngunggahang pasadok punika ring ilakitannya saha nyiarang ring paruman banjar.

Pawos 14

- 1) Krama sane nampi tamiu jantos makolem :
 - a. Yening tamiu pakulawargan/warga Indonesia dados kasadokang 3 rahina wit saking jenek.
 - b. Prade tamiu punika madunungan jantos a sasih, Kelihan Banjar patut nureksain pisan mungguing maka pabuatannya miwah surat-surat keterangan.
 - c. Yening tamiu dura Negara patut kasadokang a wengi wit saking rawuh.
- 2) Yan tan manut babuatan sang tamiu, Kelihan Banjar patut ngawaliang/ngamolihang tamiu punika.
- 3) Yening kari jenek tamiu punika rawuhing 6 sasih, taler durung kasadokin, krama sane nampi patut keni pamidanda manut pararem.

Pawos 15

- 1) Tedun makrama kalih maosang parobahan sahanan ayahan ngawit ngangken Redite Umanis Wuku Klau.
- 2) Ngangken ayah panumaya inucap, kelihan banjar ngwantunin nyacah jiwa ngetangan kalih mastikayang pakraman miwah ayah-ayahan kadi ring ajeng (1) ring wewidangannya soang-soang.
- 3) Mastikayang/pastika cacah jiwa indik pakraman miwah ayah-ayahan kapikukuhin antuk pamutus paruman banjar soang-soang dumogi kengin kalaksanayang.
- 4) Pastika inucap digelis kasuratang ring ilakita/pipil krama.

Pawos 16

- 1) Sinalih tunggil kulawarga wusan makrama Desa majalaran antuk :
 - a. Pinunas ngaraga maduluran antuk magingsir linggih saking wewidangan Desa Adat Tanjung Bungkak.

Awig – Awig

- b. Wusan makrama sangkaning magingsir linggih patut nunas pabebasan lan ilakita pastika saking prajurubanjardesa.
 - c. Kanoreyang antuk Desane riantuk risampun majalaran antuk kaiwangan-kaiwangan tur taler tan prasida ngentosin salah maprewerti.
- 2) Sulus tata kanoreyang :
- a. Pastika wenten dosan ipun.
 - b. Tan tinut ring pituduh prajuru/pesamuhan indik nyupat raga ngentosang salah maprewerti.
 - c. Ketiwakin pamidanda norene antuk paruman Desa risampun kapastika antuk saksi, ilakita, bukti-bukti antuk Bendesa Adat.
 - d. Pamidanda nganoreyang inucap yan tan prasida kabaosang ring pesamuhan Desa Adat patut kaatur ring Pemerintah maka Guru Wisesa.
- 3) Sang wusan makrama tan wenten polih pah-pahan druen Desa miwah banjar.
- 4) Desane wusan ngapeweweh setra, pasayuban, pasukertan, saluire arep ring sang kanoreyang.
- 5) Banjar-banjarsajebag Desa Adat Tanjung Bungkal tan wenang nampi jatma sane kenoreyang puniki.
- 6) Sang kenoreyang inucap kengin tedun malih makrama, maduluran antuk katerima ring banjar soang-soang, nutug ayah batu-batu sapatut ipun tur nunas baos ring warga Desa sareng sami.

PALET 2

INDIK PRAJURU

Pawos 17

- 1) Desa Adat puniki kaenterang olih “BENDESA ADAT”.
- 2) Banjar miwah tempekan kaenter olih Kelihan Banjar miwah Kelihan Nunggal-nunggal.
- 3) Bendesa Adat/Prajuru Desa kaadegang malarapan antuk pamilihan olih paruman Desa nyabran 5 warsa.
- 4) Sahanan Prajuru Desa/Bendesa Adat patut ngawit saking krama ayahan ngarep.
- 5) Sajawaning wenten para indik siosan tur dados kapilih malih.

.Pawos 18

Awig – Awig

- 1) Sane kamanggehang Prajuru-Prajuru Desa Adat inggih punika :
 - a. Bendesa Adat
 - b. Patajuh minakadi wakil
 - c. Panyarikan minakadi Juru Tulis
 - d. Patengen, ngamong druen Desa/Bendahara
 - e. Pasedahan pinaka tangan-suku/Pembantu Bendesa Adat
 - f. Taler kasangra antuk Kelihan-Kelihan Banjar sawewidangan Desa Adat Tanjung Bungkak.
- 2) Wewidangan panyangrane madudonan manut ring akeh kedik krama, gagambelan miwah pakaryanne.
- 3) Prajuru inucap ring ajeng kasudi olih paruman banjar soang-soang.

Pawos 19

- 1) Swadarmaning Bendesa Adat luire :
 - a. Ngenterang paruman-paruman Desa.
 - b. Ngenterang pangelaksanaan sadaging awig-awig.
 - c. Ngeraksa saha ngatur tatane ngangge sa raja brana druen Desa.
 - d. Nuntun tur ngenterang krama rauhing warga desane ngupadi kasukertan sakala-niskala.
 - e. Nuntun saha nyaksiang tata cara muah kasangsakaraning kauripan mabuat, sane ngalilitang sulur pakulawargan.
 - f. Nuntun saha ngenterang warga Desa ngupadi nginggilang Sang Hyang Agama, Kasucian Kahyangan-Kahyangan, Kasucian pawongan, kasucian palemahan miwah tata caraning ngangge Setra.
 - g. Maosang kalih niwakang pamutus arep ring wicara Desane.
 - h. Maka panyelidihin Desa nyane matuang baos ring sapa sira ugi.
- 2) Tata cara nglaksanayang swadarma ring ajeng, tan meren patut anut ring daging awig-awig, pararem, dresta miwah pamutus paruman Desa.
- 3) Nglaksanayang swadarma ring ajeng patut kasiarang ring Desa kapungkuran ipun.
- 4) Bendesa Adat miwah Kelihan Banjar mesama kuta naktaktis pamutus paruman Desa utawi Banjar, ngenenin pangelaksana swadarmanya soang-soang.

Awig – Awig

Pawos 20

Olih-olihan Bendesa Adat luire :

- a. Moliu saluiring duman tanding tengah ring Desa.
- b. Miwah olih-olihan siosan manut paruman Desa.

Pawos 21

- 1) Swadarmaning prajuru sane siosan wantah nyanggra Bendesa Adat manut dudonan.
- 2) Oliu-olihan prajuru inucap manut kadi oliu-olihan Bendesa Adat manut dudonan.

Pawos 22

- 1) Bendesa Adat ring sajeroning nglaksanayang swadarmanya patut mawirasa ring para pangelingsir, pamekas ritatkala wenten pakewehan Desa.
- 2) Pangelingsir inucap kawenangan mapeweweh baos pinaka tatimbangan ring Bendesa Adat diastu tan kewedi.
- 3) Mungguing pawilangan para pangelingsir Desa Adat manut makuweh Banjar, pinaka duta soang-soang banjar.
- 4) Makuweh pawilangan pangelingsir banjar, manut pablibagan miwah pawigunan soang-soang banjar.

Pawos 23

Indik ngentosin prajuru :

1. Prajuru kagentosin riantuk :
 - a. Kalayon/lampus
 - b. Pinunas ngaraga
 - c. Kanoreyang antuk krama Desa utawi banjar.
2. Tata cara ngentosin ring ajeng mangda sajeroning paruman Desa utawi banjar.

PALET 3

INDIK KULKUL

Pawos 24

Awig – Awig

- 1) Kukul Desa miwah banjar tan wenang katepak yan tan manut kadi daging awig-awig puniki:
 - a. Tatengeran upacara yadnya Desa utawi banjar.
 - b. Tatengeran wenten sinalih tunggil warga Desa sane ngelayu sekar utawi seda/padem.
 - c. Tatengeran wenten sinalih tunggil warga Desa sane mawiwaha lanang wiadin istri.
 - d. Tatengeran wenten sinalih tunggil warga Desa sane madruwe oka.
 - e. Tatengeran ngawit nglaksanayang pakaryan sakadi sampun kaarahang utawai kasiarang.
 - f. Tatengeran sangkep Desa utawi banjar.
 - g. Tatengeran wenten sinalih tunggil warga desa sane kamalingan.
 - h. Tatengeran wenten wong kapelegandang.
 - i. Tatengeran wenten krama Desa kaamuk, kabegal utawi baya pati siosan.
 - j. Tatengeran siosan manut dresta.

- 2) Kukul Desane tan kawenangan katepak sajawaning mula wantah tengeran patut katiwakang ring wong Desane sami umpami :
Yadnya Desa, paruman, pakaryan wong Desa sagrehan miwah baya pati.

- 3) Suaran kukul inucap anggen tatengeran karya sahanan yadnya, alapati, baya pati luwir ipun manut dresta :
 - a. Suaran kukul 1 tuludan : tengeran madrue oka.
 - b. Suaran kukul 2 tuludan : tengeran kelayu sekar.
 - c. Suaran kukul 3 tuludan : tengeran tedun makarya.
 - d. Suaran kukul nebeng : tengeran kamalingan, maseserep, kapelegandang, ala pati baya pati.
 - e. Suaran kukul bulus : tengeran kabakaran, ngamuk.
 - f. Suaran kukul ngempang : tengeran makarya, Dewa Yadnya, Macaru lan Melasti.

Awig – Awig

Pawos 25

- 1) Kulkul Desa/Banjar tan wenang katepak yan tan sangkaning paweweh utawi pituduh Bendesa Adat/Kelihan Banjar manut dudonan, sajawaning rikala ngawentenang tengeran ngenenin kapanca baya.
- 2) Sahanin kulkul banjar sawewidangan Desa Adat Tanjung Bungkok puniki patut nyarengin kateput parade wenten sinalih tunggil kulkul banjar nyihnayang wenten kapanca baya, alapati bayapati.
- 3) Sang nepak tan sangkaning pituduh, patut digelis atur supeksa ring Kelihan banjar maka buatang panepakane kadi ring ajeng.
- 4) Suaran kulkul sekaa-sekaa seluire ring Desa Adat Tanjung Bungkok tan wenang nyaurin suaran kulkul Desa miwah Banjar.

Pawos 26

- 1) Suaran kulkul tengeran mapekaryan, patut katedunin ayahan manut daging dedauhan utawi siaran.
- 2) Suaran kulkul tengeran ala baya, patut katedunin antuk sehanan krama rawuhing truna saha magegawan mapitulung manut rupan bayane.

PALET 4

INDIK PARUMAN

Pawos 27

- 1) Luir paruman sane wenten ring Desa :
 - a. Paruman Desa Adat : inggih punika pesamuhan Agung Desa.
 - b. Paruman Banjar pinaka pasangkepan lan pesamuhan-pesamuhan banjar.
 - c. Paruman prajuru, ritatkala ngarincikang pemargi-pemargi lan usaha-usaha Desa.
 - d. Paruman sakeluire sekaa-sekaa.
- 2) Sahanan paruman sida kalaksanayang yan sampun katedunin antuk sang patut nyarengin, majalaran suaran kulkul saha abusana nyelempot manut dresta.
- 3) Sahananing pamutus kausahayang pisan mangda malarapan antuk suaran sagalak, sagilik, saguluk utawi briyuk sapanggul.
Bilih yan prasida, suara makehan sinanggeh pamutus.

Awig – Awig

- 4) Ring sahanan paruman tan maren kariyinin antuk atur piuning ring Ida Bhagawan Panyarikan maka serana Widhi Widana pejati lan cane.
- 5) Pangawit paruman kamargiang nyacah wilangan para pamilet sane ngarawuhang miwah salantur ipun.

Pawos 28

- 1) Sahananing ayah ngarep miwah ayah balu patut nyareging paruman Desa, saha wenang mastikayang pamutus.
- 2) Sahananing ayah siosan inggih punika ayah dehe-teruna wenang nyarengin paruman, nanging tan wenang mastikayang pamutus.

Pawos 29

- 1) Paruman Desa Adat kawentenang sanistane 6 (enem) sasih a pisan, nemoning Redite Umanis Klau.
- 2) Paruman prajuru kawentenang sanistane a sasih a pisan.
- 3) Paruman banjar wenang kawentenang nyabran a sasih manut dresta.
- 4) Paruman ring ajeng taler kawentenang pablibagan manut wigunan ipun.
- 5) Nangken paruman ring ajeng, Bendesa Adat utawi Kelihan banjar patut nyiarang pamarginya ngenterang Desa utawi Banjar pamekas ngenenin indik :
 - a. Munjuk lungsuring pakraman utawi ayah-ayahan.
 - b. Pamargin panelas miwah sulur arta-brana druen Desa utawi Banjar.
 - c. Pamargin usaha-usaha Desa utawi Banjar sane mabuat.
 - d. Sahanan wicara saha pamutus-pamutusnya.
 - e. Daging pararem-pararem miwah pasuara-pasuara sane mabuat.
 - f. Rarincikan prajuru ngenenin usaha Desa/Banjar kapungkuran.
 - g. Miwah sane siosan.
- 6) Sahanan siaran ring ajeng katitenin saha katiwakin pamutus antuk paruman Desa.
- 7) Pamutus paruman inucap ring ajeng sinanggeh sepat siku-siku, patut katinutin antuk warga Desa sami pamekas antuk prajuru.

Awig – Awig

Pawos 30

- 1) Paruman Desa patut ngamedalang pararem-pararem anggen mitegepin awig-awig sinunggal manut dudonan.
- 2) Daging sahanan pararem patut ring awig-awig.
- 3) Sane patut kamungguhing ring pararem minakadi :
 - a. Dewasa ngawit bantang awig-awig sane mabuat.
 - b. Rincikan panyacah daging awig-awig sane mabuat.
 - c. Agung alit danda panikel-panikelnya.
 - d. Tata sulur ngamargiang awig-awig.
 - e. Miwah sahanan indik siosan anggen mapitegep daging awig-awig.
- 4) Paruman Desa wantah sinanggeh Paramewisesan sane ngawenangin tata cara pangenter Desa manut dresta.

Pawos 31

- 1) Paruman-paruman inucap patut katuntun antuk Bendesa Adat.
- 2) Sahanan Prajuru Desa wenang tur patut nyarengin paruman Prajuru Desa.
- 3) Paruman Prajuru Desa kawenangin wantah ngarincikan tata upaya nglaksanayang sakeluire.
- 4) Sahanan sane sampun karencanayang bilih-bilih rencana sane pacang niwakang tategenang ring I krama tan wenang kalaksanayang sadurung kapikukuhin antuk pararem Desa manut dudonan.

Pawos 32

- 1) Paruman Prajuru wenang ngamedalang pasuara-pasuara anggen mitegepin awig-awig Desa.
- 2) Daging pasuara tan maren patut :
 - a. Seeloan ring daging awig-awig.
 - b. Manut ring sukertaning Agama miwah dresta.
 - c. Pastika nyantenang agung-alit pamidandanya yan kapurug.

Awig – Awig

PALET 5 INDIK PADRUEN DESA Pawos 33

Padruen Desa Adat Tanjung Bungkok marupa :

- a. Kahyangan Tiga minakadi : Pura Desa/Bale Agung, Pura Dalem miwah Pura Kahyangan.
- b. Palemahan Desa, makadi :Pelaba Pura.
- c. Tanah setra.
- d. Piranti-piranti.
- e. Wewangunan.
- f. Miwah sane siosan.

Pawos 34

- 1) Munjuk lungsuring padruen Desa sane marupa tanah Pelaba Pura miwah tanah siosan, patut pastika kailekiteyang.
- 2) Kawigunan tanah pelaba pura miwah tanah siosan kadabdab antuk paruman Desa manut Petitis Desa.

Pawos 35

- 1) Padruen Desa Adat Tanjung Bungkok sane marupa Setra :
 - a. Setra Ageng/Agung.
 - b. Setra Alit.
 - c. Setra Rare.
- 2) Setra Ageng lan Setra Alit kaanggen mamendem sawa wong duur.
- 3) Setra Rare kaanggen mamendem sawa wong Rare.
- 4) Setra babajangan lan Setra pakingsan wantah tan wenten.

PALET 6 SUKERTA MAPITEGEP Pawos 36

- 1) Sahanan karang paumahan patut :
 - a. Pastika wenten wates ipun.
 - b. Mapemedalan ka rurung utawi ka margine tan wenten kabebeng.

Awig – Awig

- 2) Bendesa Adat patut ngusahayang mangdane pakarangane kadi ring ajeng kawentenane.

Pawos 37

- 1) Sahanan krama ngawatesin pakarangane soang-soang jantos sida trepti nyatur desa.
- 2) Wates karange sane majepitan kategen olih kramane sane maulunan kawates inucap.
- 3) Taru miwah olih-olihan sane mauip ring wates, kadrue olih krama sane negen inucap.
- 4) Sahanan krama yan pacang ngwangun patut nganutin asta kosala kosali miwah asta bumi sanistane petites niskala.

Pawos 38

- 1) Tan wenang ngenahang barang sane ngeletehin karang paumahan bilih-bilih yan kaletehan nglantur, sinanggeh nglimbak ngaletehin Desa manut Agama.
- 2) Sahanan krama desa rawuhing sang sinanggeh tamiu, wenang ngusahayang mangdane wewidangan Desane trepti, bersih tur aman, inggih punika; tan dados ngutang kakotoran/lulu ring telajakan Desa minakadi, tukas utawi got.

Pawos 39

- 1) Tanem tuwuh tatanduran sakeluire miwah tata nganggen karang tan wenang naonin miwah ngawanan pocol utawi ngletehin karang panyanding nyane.
- 2) Parade wenten asapunika wenang kasupat gantungin utawi katiwakan pamidanda siosan.
- 3) Tanem tuwuh miwah tatanduran sane mayanin ring panyadingnya, panyepat gantunge wenang maren a depa agung ngajeroang saking wates.

Pawos 40

- 1) Sahanan arga sane miara saluiring wewalungan patut siaga nitenin negul utawi ngarogorin mangda ubuhannya tan wenten ngrusakin karang utawi abian anak siosan bilih-bilih mangda sampunang jantos ngranjing ngletehin Kahyangan/Pura.

Awig – Awig

- 2) Parade wenten wewalungan ngeleb saha ngranjing k pakarangan siosan, sang madrue karang patut malungguhang ring sang nruwenang wewalunganne, bilih-bilih yan ngawanang wenten karusakang, kadulurin antuk nunas baos ring Kelihannya, mangda katiwakang pamidanda agung-alit sapatut ipun.
- 3) Yan ring a sasih jantos ping 3 (tiga) sampun malungguhang, wewalungane wenang katiban. Penaban punika uningayang ring Kelihan.
- 4) Wewalungan tetaban wenang katebus olih sang nruwenang, agung alit panebusannya katiwakin olih Kelihan Banjar kadulurin danda manut karusakan sane kawetuang.
- 5) Yening a sasih jantos ping 3 metaban kadi ring ajeng, wewalungane wenang kaambil tan patut katebus.
Pamargin panebane punika kasadokang ring Kelihan Banjar.

Pawos 41

- 1) Parade wewalungan sane ngeleb ngranjing ka Kahyangan/Pura sane madrue wenang kasisipang antuk danda prabea upakara pamarisudha sapatute.
- 2) Tata carane malungguhang naban miwah nebas pateh sakadi ring ajeng.

PALET 7

DUSTA LAN BAYA

Pawos 42

- 1) Sahananing warga Desa parade uning ring wentene jatma malaksana dusta patut digelis utawi pramangkin atur uning ring Prajuru.
- 2) Laksanane sinanggeh dusta miwah baya kacaping ring ajeng luih bacakan ipun
 - a. Jiwa baya.
 - b. Arta baya.
 - c. Geni baya.
 - d. Pamegandang pamekas.
 - e. Dura cara ring Agama.
- 3) Bilih mabuat kawentenan ipun sang uning inucap patut digelis nyuarayang kulkul banjar manut ring rupan pangelaksana dustane.

Awig – Awig

Pawos 43

- 1) Sahanan warga Desa parade uning ring kawentenan baya utawi penangkan baya, patut pramangkin atur uning ring Prajuru.
- 2) Bilih mabuat kawentenan ipun, sang uning patut digelis nyuarayang kulkul banjar.
- 3) Baya utawi penangkan baya munggah ring ajeng umpami : umah puwun, blabar, baya pati, alapati.

Pawos 44

- 1) Warga Desa kaicalang miwah kamalingan parade pacang maserep patut nunas pabebasan miwah panuntun ring kelihan banjar.
- 2) Parade genahe maserep nglangkungin banjar siosan, patut nunas pabebasan utawi uwah-usahan ring Kelihan banjar irika.
- 3) Kelihan Banjar inucap ngicenin penuntun mangda tata carane maserep manut kadi dresta.

Pawos 45

- 1) Sahanan warga Desa yan polih nuduk barang sakeluire ring sawewidangan Desa Adat Tanjung Bungkak patut atur uning ring Kelihan Banjarnya.
- 2) Kelihan inucap nyiarang barang dedudukan punika, mangda sang madrue mawantun ngamolihan barang nyane.
- 3) Sang mariangkenang patut nyidayang nyihnayang paritas mungguing barang punika maka jati padruennya.
- 4) Parade jantos 3 sasih tan wenten jatma ngelingang, wenang kadrue antuk sang nuduk.

Pawos 46

- 1) Pakaryan druen sinalih tunggil krama sane mabuat, tata panyanggranya dados kasuserahang ring banjar soang-soang sajawaning karya Ngaben. Yan manut dresta ring Desa Adat Tanjung Bungkak, tan wenang nyerahang karya ring 2 (kalih) banjar, yening wantah prasida antuk mabuat mangda ka tigang banjar, yan tan prasida kaangkat antuk a banjar kamaon, taler kadadosang puput antuk pakulawarganya sang mabuat.
- 2) Banjar wenang ngardi awig-awig ngamanggehang tata cara nyanggra pakaryan kramane sane munggah ring ajeng.

Awig – Awig

- 3) Panyanggran nyane patut madarsana antuk arsa krama tulung ring sang makarya nanging tan meren miteketin kramane ring banjar muah Desa.
- 4) Bilih karyane dahat abot, wenang panyanggran nyane kasukserahang ring Desa.
- 5) Pakaryan sane patut dados kasukserahang ring panyanggran banjar luire :
 - a. Ngupakara sawa ngunggahang ring don bingin utawi nyekah rawuh puput.
 - b. Yening kapredida antuk mabuat sahananin karya yadnya siosan.
 - c. Saluiring pakeweh ring krama soang-soang manut dresta banjar dados kasukserahang ring banjar utawi Desa.

Pawos 47

- 1) Awig-awig banjar ring ajeng tan dados kalaksanayang sadurung kacirenin antuk Bendesa Adat.
- 2) Daging awig-awig inucap patut tan maren ngadungang mungguing wibuh kencit pakaryane ring agung alit panyembrahmane ring banjar.

SARGA IV

SUKERTAN TATA AGAMA

PALET 1

INDIK DEWA YADNYA

Pawos 48

- 1) Palinggih panyiwian sawewidangan Desa Adat Tanjung Bungkal :
 - a. Sane kasungung antuk Desa Adat :
 1. Kahyangan Tiga, luih ipun :
 - Pura Dalem/Penataran.
 - Pura Desa lan Bale Agung.
 - Pura Kahyangan lan Prajapati.
 2. Pura Maspahit.
 3. Pura Uluwatu.
 4. Pura Gunung Agung.
 - b. Pura sane kasungung antuk pakulawargan minakadi :
 1. Pura Dadia.
 2. Pura Panti.
 3. Paibon-paibon.

2)

- a. Rahina piodalan mapenyanggra ngupahayu jagat kadi ring sor :
 1. Piodalan ring Pura Dalem : Rahina Anggara Kliwon, wuku Medangsia.
 2. Piodalan ring Pura Desa lan Bale Agung : Rahina Buda Kliwon, wuku Ugu.
 3. Piodalan ring Pura Kahyangan lan Prajapati : Rahina Anggara Kliwon, wuku Tambir.
 - b. Piodalan ring Pura ajeng puniki sawilang 6 sasih. Odalan ring Pura Maspahit dinuju Purnamaning ka Dasa lan Purnamaning Kapat.
 - c. Piodalan ring Pura Uluwatu lan ring Pura Gunung Agung ring Purnamaning ka Dasa (a warsa).

Ngupahayu Desa ngawentenang tawur, sasih kaenem awarsa. Ritatkala Pakiyisan sasih kasanga manut arah-arahan saking Guru Wisesa. Pura Dadia, Pura Panti lan Paibon kasukserahang ring pangemong soang-soang.
- 3) Pangaci ring pura-pura inucap patut kacaping Sastra Agama saha kalaksanayang nista, madya, utama manut kawentenan lan pararem.
- 4) Pangempon pura soang-soang manut dresta ring sor :
- a. Makadi Pura Dalem, Pura Maspahit lan Uluwatu sampun kasukserahang panyanggranyane antuk Mangku Dalem.
 - b. Pura Kahyangan/Prajapati sampun kasukserahang panyanggrannyane ring Mangku Kahyangan.
 - c. Pura Desa/Bale Agung, tawur kenem, pekiyisan hidangan lan tawur kesanga puniki sami kasanggra antuk Desa Adat.

Pawos 49

Ring soang-soang pura inucap kawentenang Pamangku. Ngadegang Pamangku manut dudonan Desa Adat Tanjung Bungkak. Pamangku-pamangku ring Desa Adat Tanjung Bungkak, sami pada nurunin utawi ngwaris, taler wenten Pamangku nampih ring soang-soang banjar.

Awig – Awig

Pawos 50

Swadarmaning Pamangku luire :

1. Ngenterang upakara piodalan ring Kahyangan Tiga utawi ring soang-soang krama.
2. Tan wenang salah suluh, yan mamurug wenang pamangku inucap nyepuhin raga.
3. Parade silih sinunggil Pamangku kapialang utawi kacuntakan, kengin Pamangku sane nampih patut ngamargiang swagina mangku.

Pawos 51

Petitis utawi olih-olihan Pamangku :

1. Pelaba Pura.
2. Ritakala sarin canang aturan-aturan krama.

Pawos 52

- 1) Yening manut dresta ring Desa Adat Tanjung Bungkak, yening Pamangku seda/kelayu sekar kagentosin antuk pawaris ipun.
- 2) Parade wenten sinalih tunggil Pamangku malaksana asta dusta patut ngwentenang panyucian raga utawi panyepuhan.

Pawos 53

Sukertan Kahyangan makadi ring sor :

1. Tan kalugra ngranjing ka Pura luire :
 - a. Sang katiban catur cuntaka, makadi sebel ngraga.
 - b. Sebel kandel, ngeraja suwala salami dereng mabersih.
 - c. Sebel madrue putra, sadurung tutug kambuhan/bulan pitung dina.
 - d. Sebel pangantenan, salami dereng mabiyakala.
 - e. Sebel riantukan madrue kulawarga
 - f. Kelayu sekar/padem jantos masepuh utawi tutug 12 dina.
2. Sahananin ngletehang :
 - a. Makta barang sahananin ngletehang.
 - b. Sato agung, sajawaning rikala mapepada.
 - c. Mabusana tan manut kadi tata caraning ngranjing kaPura, sadereng polih pituduh Prajuru Desa.

Awig – Awig

3. Pratingkahe tan wenang ring Pura :
 - a. Masumpah/cor sajawanan pituduh Prajuru Desa.
 - b. Makobetan, masenengan, masenggama, makolem asiki, lanang wadon, mamacin, mawarih, nglukar busana, menahin pusungan rikala ngayah, rikala majejahitan patut gelung pusung macongor lidinnya.
 - c. Mungguh tedun ka Palinggih sajawanan Pamangku, lan pituduh Bendesa Adat.
4. Sinalih tunggil mamurug kacaping ajeng puniki keni pamidanda pameriascita sapatutnya.

Pawos 54

- 1) Yan wenten jatma karauhan ring Pura kengin kapintonin parade rumasa kasumangsayan yan tan wiakti jatma inucap kasisipin manut pararem.
- 2) Parade Kahyangan kahanan Dumanggala, minakadi kapancabaya Pamangku patut digelis nyodokin ring Prajuru Desa, mangda marumang krama Desa tur ngwentenang pemeriascita sepatutnya.

PALET 2

INDIK RSI YADNYA

Pawos 55

- 1) Sang pacang madeg pandita utawi pinandita minakadi balian sonteng, kubayan, suka luiring jagi ngenterang yadnya patut masadok ring Prajuru Desa kalih Parisadha Hindu Dharma.
- 2) Prajuru patut nitenin tur wenang ngalangin parade wenten kacihnan sasar kakecap miwah drestane tur sareng nyaksinin upacara saha nyiaran ring paruman Desa tegap rauhing wates kawenangan pangenter yadnya.
- 3) Krama Desa patut ngaturang ayah sapemadeg miwah ring pangelepas sang Sulinggih riwekas katuntun antuk Prajuru.

Pawos 56

- 1) Sang Sulinggih patut ngariyinin ngayuning ring wewidangan jagat Tanjung Bungkak, sasampune wawu muputang yadnya ka jabar tios jagat utawi ka dura desa.

Awig – Awig

- 2) Krama Desa patut sareng ngawasin nitenin katuntun antuk Prajuru mangda sahanan yadnya sane kawentenang kaicen pamuput olih Pedanda utawi Pinandita manut kawenangannya soang-soang.

PALET 3
INDIK PITRA YADNYA
Pawos 57

Pamargin Pitra Yadnya madudonan manut kadi ring sor :

1. Pangupakaran sang kelayu sekar :
 - a. Antuk mendem utawi ngeseng maka cihne pakingsan ring Ibu Pertiwi utawi ring Bhatara Brahma.
 - b. Atiwa-tiwa utawi Ngaben.
2. Upakara Pitra Yadnya riwus kaabenan maasta Mungguh ring Don Bingin/Nyekah (wawu nglaksanayang palinggih Bhatara/Bhetari).

Pawos 58

Swadarmaning lan tatujon parade wenten sinalih tunggil krama Desa kelayu sekar :

1. Sang kaduhkitan patut :
 - a. Nyadokang ring Bendesa Adat tur nunas tatimbangan ring kawentenannya.
 - b. Ngaturin krama Desa ngremba makarya eteh-ete saha madulurin panyembrama antuk canang sasida antuk, utawi mapeweweh sajeng ring pangeremba jantos ka setra.
2. Swadarmaning Desa/Banjar :
 - a. Bendesa Adat/Kelihan Banjar maritetes pamargin sang kaduhkitan napi sane pacang kapendem, napi sanepacang makingsan rihinan utawi lantur kaabenan. Yening sampun mayusa 3 oton, polih banjar tan polih pantus.
 - b. Kelihan Banjar ngwentenang suaran-suaran kulkul manut pawos 24 (tengeran kepademan).
3. Panyanggran Desa salantur ipun :
 - a. Soang-soang banjar nedunin pantus manut pararem yening durung maketus tan polih pantus.

Awig – Awig

- b. Ngremba ngaryanin eteh-ete saha sawa kasarengin antuk krama Desa sane rauh maaksian.
 - c. Sami krama Desa nyarengin ka Setra jantos pamendeman puput.
 - d. Krama Desa lanang istri ngambil karya manut dresta ngremba rikala pangutangan, kapatut krama mabusana adat sanistane nylempot/masenteng.
4. Tan kengin ngletlet langkungan ring 14 rahina tur patut polih pagebangan banjar.
 5. Tan kalugra nginepang bangbang.
Tan kalugra mamendem :
 - a. Ritatkala panemuan dina sapta wara lawan panca wara, ngametuang urip 13 lan 14 mawasta gotongan semut sadulur.
 - b. Ritatkala Purnama, Tilem, Kajeng Kliwon, Pujawali lan rerahinan gumi.
 - c. Pujawali ring Pura Dalem masengker 4 dina.
Pujawali ring Pura Kahyangan masengker 6 dina.
Pujawali ring Pura Desa masengker 3 rahina.
Galungan, Kuningan masengker 3 rahina.
Sang kelayu sekar ring ajeng puniki bangiang sakadi merem rihin, sane nemoi pujawali lan rerahinan gumi.
 6. Kalugrayang mendem patut paitungan :
 - a. Anak alit wau embas.
 - b. Anak alit durung tumbuh untu.
 7. Atiwa-tiwa ngaben manut dresta ring Desa Adat Tanjung Bungkal :
 - a. Soang-soang krama Desa ngamedalang pantus beras 1 ½ kg, madaging jinah.
 - b. Saluiring pangabenan patut tur wenang kasanggra antuk Desa.
 - c. Panyanggran Desa manut pamargi luihnya : Nista, Madya, Utama.
Saluirin krama makarya ngaben, dados mawadah/bale-bale.
 - d. Parade sinalih tunggil krama nglaksanayang pangabenan, diastun ring sawa maprebea; inggih punika ngwangun, dados kasukserahang panyanggran Desa ring nista, asapunika salantur ipun.
 - e. Yan kasukserahang ring Desa nista, sajabaning pangutangan tur nganyut ka segara, Desa tedun makarya apisan (arahina).

Awig – Awig

- f. Yan kasukserahang ring madya, sajabaning pangutangan tur nganyut ka segara, Desa tedun makarya ping kalih dina. Puniki polih sangu lanang istri apisan (aselid).
 - g. Yan kasukserahang utama, sajabaning pangutangan/palebun tur ka segara. Desa tedun makarya ping 3 dina. Puniki polih sangu ajengan lanang istri, sanganan tur rauh ring segara polih ajengan panganyutan.
 - h. Yening wenten sinalih tunggil krama Desa atiwa-tiwa sane manut pamargi utamaning utama, Desa nyanggra karyan ipun ngawit saking ngempug sang nebuk. Kirang langkung ping 7 (pitu) sajabaning pangutangan lan ka segara. Desa polih sangu ping 3 lanang istri, taler polih sanganan panebeng, tur polih ajengan panganyutan.
 - i. Benjangne krama Desa maprayascita ring banjar sane ngarepin karya, taler polih sanganan prayascita.
8. Parade wenten krama Desa jagi ngiring Siwannya soang-soang patut nunas baos ring Prajuru Desa miwah Kelihan-kelihan Banjar.
 9. Pangiringe punika dados kamargiang antuk pakulawarga. Yan ring pangutangan/palebun dados nunas pangeremba ring soang-soang banjar, tur banjar patut nyuarayang tatengeran kulkul alit. Benjangne banjar maprascita alit.
 10. Sinalih tunggil krama Desa tan kawenangin nudut sawa jatma siosan pakulawargan yan tan wantah kapatutan.
 11. Yan wenten sinalih tunggil mamurug sepat iki, wenang kadanda antuk Desa.

Pawos 59

Yening wenten krama siosan nganggen setra, keni panukun setra 500 kepeng bolong sawiji.

Pawos 60

- 1) Diparade lampus sangkaning ulah salah pati, kabengawan utawi hanyut, kelem. Utawi sapenunggalannya kengin dados kabuat budal tur kapreteka kadi patut. Sakewanten kamanggala antuk upakara panebusan lan pangulapan, wau polih panyanggran Desa.

Awig – Awig

- 2) Yan wong istri lampus ngadut manik, tan wenang kapendem sadurung bobotane embas. Kapatut manik punika kamedalan rihin utawi antuk operasi olih dokter.
- 3) Yan wenten jatma lampus ring wewidangan Desa Adat Tanjung Bungkak, tan keni antuk ngalingan mangda kasukserahang ring Guru Wisesa.

Pawos 61

- 1) Parade kapademan/ngaben nadak :

Sang sinanggeh kacuntaka miwah sengkernya sakadi ring sor :

- a. Cuntaka kelayu sekar ring bebajangan :

1. Parade kapendem/ngaben, ngawit papendeman lan pangutangan jantos 12 rahina.

2. Parade ngaben pangeritan/ngaben cuntakan ngawit saking maseserah ring Kahyangan Tiga, jantos pangutangan 12 dina.

- b. Kulawarga sajeroning pakarangan lan sapenunggalan sanggah/pamerajan taler keni kasebelan 12 dina.

- c. Sang madrue layon.

1. Durung makepus udel, abulan pitung dina (42 dina).

2. Risampun makepus udel nglanglang masue 12 rahina.

- 2) Pabersihan sang kelayu sekar.

Sane katiban cuntaka tur sengkernya :

- a. Ngraja suwala, sengkernya ngawit saking ngraja suwala rauh kabersihan.

- b. Ngembas putra, sane kacuntaka kulawarga sane ngembas putra lanang istri, manut sengker abulan pitung dina (42 dina) yan sampun kaupakarayang manut dresta.

- c. Keruron, sane kacuntaka kulawarganya lanang istri, sengkernya abulan pitung rahina (42 dina), yan sampun matirta/maprascita.

- d. Pawiwahan, sane cuntaka sang sane kaupakarayang lanang istri, sengkernya riwusan mabiyakala utawi mawidhi widana.

- e. Gamia Gemana, sane cuntaka sane nglaksanayang gamia gemana, sengkernya ngantos sasampune kapalasang tur sampun kawentenan pamerascita raga tur ngwentenang prascita Desa lan Kahyangan Tiga.

- f. Anak istri mobot tan alakari rabi manut dresta nenten wenten upakara pawiwahan, sengkernya upakara pabiyakalan tur mawidhi widana.

- g. Mamitra ngalang, cuntakanya ngantos kawentenang upakara Widhi Widana.
 - h. Embas putra sadereng wenten upakara pawidhi widanan cuntakan ngantos wenten sane mameras sang putra tur sampun kawentenang upakara manut ajaran Agama.
 - i. Cuntaka Sad Atatayi, cuntakan ngantos sampun maprascita raga, tur nenten pisan dados ngamungganghang upakara pa Dwijatian.
- 3) Tan keni cuntaka luirnya :
- a. Sang Sulinggih lan Pamangku Kahyangan Tiga.
 - b. Rikala ngwangun yadnya, ring Kahyangan Tiga Desa risampun ngalang tengah/Ngalang sasih.

Pawos 62

- 1) Atiwa-tiwa/pangabenan kalaksanayang antuk :
- a. Nyawa Rai utawi Nyewasta Geni, kamargiang santukan galihe tan kakeniang utawi tan ngagah.
 - b. Sawa Preteka, kamargiang riantukan ngagah utawi mreteka sawa bah bangun.
 - c. Sawa ngwasta, panyapuhan ring gegemuk.
- 2) Dudonan pangabenan ngawit saking ngagah, ngeseng lantur nganyut ka segara.
- 3) Panumayan pangabenan :
- a. Pangabenan dados kamargiang pramangkin rauh salantur ipun.
 - b. Pangabenan ngemasa, ring Desa Adat Tanjung Bungkak yan tan wenten kapiambengan sawilang dasa arsa ngwentenang pangabenan ngemasa/ngerit.
- 4)
- A. Saluire sinalih tunggil krama Desa padem utawi seda, diastun kapendem/makingsan ring geni, diastun kaabenang manut pamargi, ring soang-soang banjar ngamedalang. Pantus minakadi : kelapa 5 bungkul, busung a muncuk, selepan 2 papah lan jinah 2000 kepeng bolong.
 - B. Ring soang-soang krama Desa rauh ka balu ngamedalin pantus beras pada 2 cangkop sawatara 1 ½ kg. madaging jinah manut lila utawi kawentenannya.

Awig – Awig

Pawos 63

Tata sulus pangabenan ring ajeng mapeweweh kadi ring sor nunas tirta ring Kahyangan Tiga, manut upakara sajangkepnyane.

Pawos 64

- 1) Yening wenten sinalih tunggil krama sane madrue karya, tur sampun katerima olih Desa, banjar tan dados malih nerima karya.
- 2) Taler asapunika, yening sinalih tunggil banjar sampun nerima karya sahananing yadnya, Desa taler tan dados nerima karya yadnya.
- 3) Diparadene sinalih tunggil banjar/Desa sampun nerima karya, raris wenten krama Desa kelayu sekar/padem ring wewengan karya inucap, Sang padem puniki tan dados kamargiang/durung dados katerima olih Desa, patut rerehang malih galah, manut pamargin dresta Desa Adat Tanjung Bungkak.

Pawos 65

- 1) Yening sinalih tunggil krama masukserah karya pangabenan ring desa, patut paitungan sengkernya ring karya pangabenan sane dumunan :
 - a. Yening karya pangabenan utama, nganggen sengker abulan pitung dina (42 dina), wau dados nerima karya pangabenan utama malih.
 - b. Yening karya pangabenan madya, nganggen sengker wusan 12 (roras) dina.
 - c. Yening karya pangabenan nista, nganggen sengker 7 (pitung) dina.Sengker puniki ngawit tedun makarya pangambilan karya pangabenan sane kapungkuran.
- 2) Yan wenten sinalih tunggil wusan pangutangan pangabenan wiadin mendem, benjangne tan dados malih nglaksanayang pangutangan/mendem (tan dados meped), iki kabaos makirim wangke/bangke.
- 3) Yan wenten sinalih tunggil krama Desa ritatkala madrue karya Dewa yadnya tur sampun katerima olih Desa/Banjar yening wenten sane jagi ngaben, durung dados katerima yening durung puput karya Dewa Yadnya punika.
- 4) Ngawit tan dados nerima karya manut dudonan, yening karya panyekahan lan karya padudusan ngawit saking pangingsahan rauh panganyutan ka segara.

Awig – Awig

PALET 4

INDIK MANUSA YADNYA

Pawos 66

- 1) Manusa Yadnya inggih punika : upakara swadarmaning manusa manut swadarmaning Agama, tan maren nganutin dresta, ngawit saking patemonin kama petak kalawan kama bang sajroning garba jantos lampus riwekasan.
- 2) Upakara-upakara ring ajeng luire :
 - a. Magedong-gedongan, duk pangerempinine i biang.
 - b. Duk sang kama reka (rare) wau embas.
 - c. Kepus udel.
 - d. Nutug roras rahina.
 - e. Rare mayusa abulan pitung rahina/ akambuhan.
 - f. Tigang sasih.
 - g. Enem sasih/awoton.
 - h. Tutug kelih; ngraja suwala sane wadon, ngembakin sane lanang.
 - i. Mapandes utawi matatah.
 - j. Mawiwaha nganutin pagrahasan
 - k. Mawinten, Ekajati.
- 3) Upakara-upakara inucap tan maren ngamanggehang nista, madya lan utama, nganutin Sastra Agama saha dresta ngwenayang Desa Nawa Cara.
- 4) Upacara pawintenan manut sakadi pawos ring ajeng parade ngwentenang yadnya utawi manut dresta parade pawintenan ngraga miwah pawintenan sinarengan taler manut pawos ring ajeng.

PALET 5

INDIK BHUTA YADNYA

Pawos 67

- 1) Bhuta Yadnya inggih punika : upakara-upakara banten pabiyekalan (pelaba) miwah pacaruan sarwa prani kaatur ring Ibu Pertiwi, ring Pura-Pura, Sanggah/Merajan ring manusa, ring Bebhutaan, luire sarwa :
 - a. Tanem tuwuh/kayu-kayuan.
 - b. Ingon-ingon utawi wewalungan.

- c. Lelandem sarwa besi, gamelan, wewalian (balih-balihan).
Manut genah miwah panyawangan lan rerahinan miwah sasih sane kamanggehannya antuk i krama Desa Adat Tanjung Bungkok miwah ring soang-soang.
- 2) Upakara-upakara pabiyakalan ring Pertiwi miwah ring Kahyangan lan Bebhutaan kabaos Macaru; kamargiang nista, madya, utama manut wiguna luire :
- a. Caru Eka Sata.
 - b. Caru Panca Sata.
 - c. Caru Panca Sanak.
 - d. Caru Panca Kelud.
 - e. Caru Rsi Gana.
 - f. Caru Wrespati Kalpa.
 - g. Caru Tawur Agung.
- 3) Yan wenten kadurmanggalan jagat kacirenin antuk :
- a. Jatma kageringan.
 - b. Tumbuh-tumbuhan kageringan.
 - c. Wewelungan kageringan.
 - d. Miwah ceciren siosan sane mawinan sasab merana patut kawentenan pacaruan manut dresta.
- 4) Sajawaning ring ajeng kawentenan yadnya sadina-dina sakadi mejot-jotan nyabran wusan ngrateng.
- 5) Tale-tale siosan ring ajeng kawentenang upacara.
Masapuh-sapuh rikala pacang ngaturang pujawali ring Pura. Ring sasih kaenem kamargiang aturan caru ring sawilang bucu wates Desa lan pa empatan.

Pawos 68

Upacara tawur kesanga rikalaning tilem kesanga :

- 1) Majeng ring Ida Bhatara-Bhatari lan Bhatara ring segara :
- a. Panglong ping 12 (roras) para Ida Bhatara sareng sami lan ring para Manca sawewidangan Desa Adat Tanjung Bungkok nyoreyang munggah ka Bale Agung/Bale Panjang.
 - b. Panglong ping 13 utawi ping 14, melasti ka segarakairing antuk sanak lan manca sawewidangan Desa Adat Tanjung Bungkok.

- c. Panglong ping 14 Ida Bhatara-Bhatari nyejer ring Bale Agung/Bale Panjang.
 - d. Ring panglong ping 15 utawi Tilem Ida Bhatara-Bhatari sami sadurunge mantuk ka jogannya soang-soang kaaturan lan napak caru ring natar Bale Agung/Bale Panjang tur krama Desa Adat Tanjung Bungkok ngaturang papranian.
- 2) Upakara Tawur Kasanga kamargiang ring Tilem Kesanga manut upacara kadi ring sor:
- a. Pacaruan kawentenan ring wates Desa lan ring paempatan.
 - b. Ring kulawarga soang-soang, mabiyakala ring natar paumahan.
 - c. Ngwentenang pangerupakan mabuu-buu.
 - d. Tan kalugra malila-lilayang antuk geni miwah ngrupuk jantos langkungan ring tengah wengi, reh rahina inucap sampun nampih rahina sipeng.
- 3) Tawur Kesanga rauh puput antuk panyepian, sami kasanggra lan prabea antuk Desa Adat.

Pawos 69

- 1) Upacara ring rahina Nyepi/Sipeng patut kamargiang Catur Brata :
- a. Amati Geni, sajawaning :
 1. Madrue rare durung mayusa 3 sasih, ring genah rare inucap.
 2. Matepetin wong sakit, ring genah sang sakit.
 3. Madrue layon, ring sawa inucap.
 - b. Amati karya, tan kengin nyambut gawe sajawaning pecalang Desa lan Prajuru Dinas miwah sang polih wakwakkan (ijin) antuk ilikita pastika saking sang angawerat.
 - c. Amati lampah, tan kengin malelungan.
 - d. Amati lalangan, tan kengin masuara gora, maoneng-onengan utawi maplalianan lan seluir ipun.
- 2) Sawilang panyepian ring Desa Adat Tanjung Bungkok ngaryanang pecalang utawi petugas-petugas panyepian kacirenin antuk busana :
- a. Destar selem lan sekar pucuk bang.
 - b. Kuaca putih.
 - c. Selempot poleng.
 - d. Wastra selem.

Awig – Awig

- e. Maseselet antuk keris.
- 3) Sinalih tunggil krama Desa madrue anak alit, matepetin sakit, madrue layon, ring pamedalan nyane kadagingin sawen antuk embotan pandan maka cihna wenten kapialang.
- 4) Pabratan inucap kamargiang saking semeng jantos surup surya.
- 5) Sang murug kacaping ajeng keni pamidanda manut pararem Desa.
- 6) Riwusan Nyepi kawastanin Ngembak Geni, mapiteges pangelukaran Yoga Samadi kaduluran antuk pangelaksana suksema soang-soang krama Desa maka cihna pangawit Icaka Warsa, para kulawarga ngwentenang Pasimakraman.

SARGA V

SUKERTAN TATA PAWONGAN

PALET 1

INDIK PAWIWAHAN

Pawos 70

- 1) Pawiwahan inggih punika patemoning purusa kalawan pradana malarapan antuk panunggalan kayun suka samasuka kadulurin antuk upasaksi sekala niskala.
- 2) Pamargin pawiwahan :
 - a. Pamadikan kamanggala antuk pakraman.
 - b. Ngrorod/ngrangkat/nglayat rihin wawu pakerunayang utawi mapejati.
 - c. Nyeburin utawi nyentana nyeburin risampun nganutin upakara pamerasan.
- 3) Pidabdab sang pacang mawiwaha patut :
 - a. Sampun manggeh deha-teruna (prasida nganutin Undang-Undang).
 - b. Sangkaning pada rena (tan kapaksa).
 - c. Nganutin kacaping Agama (tan Gamia Gemana).
 - d. Kawisudayang parade pangambilan siosan Agama miwah kapati wengi.
- 4) Pamargin pawiwahan mangda taler nganutin “Undang-Undang Perkawinan”.

Pawos 71

- 1) Pawiwahan sane kamanggehang patut ring Desa, makadi ring sor :
 - a. Sampun ngamargiang pabiyakala/pasakapan mawidhi Widana kasaksiang sakala niskala antuk Pandita utawi Pinandita.

Awig – Awig

- b. Wenten pasaksi Bendesa Adat, Kelihan Banjar Dinas sane makelingan utawi ngilekitayang pawiwahane.
 - c. Sajeroning natab pabiyakalan turing mobot tan a laki rabi, patut nganggen keris lan carang dapdap rikala natab upacara pabiyakalan.
 - d. Nyihnayang angga lan matingkah manut adat lan Agama Hindu.
- 2) Pawiwahan sane tan manut kadi ring ajeng sinanggeh tan patut (tan sah).

Pawos 72

Tata caraning parabian manut ring sor :

- 1) Sapasira ugi pacang ngwarangan pakulawargan patut masadok ring Prajuru. Salanturnyane Prajuru maritatas manut tan manut kacaping parabian.
- 2) Pamargin pamadikan :
 - a. Pakrunaan jantos ping 3 saha soang-soang malarapan :
 1. Kapertama antuk canang.
 2. Kaping kalih antuk canang ring sajeng.
 3. Kaping tiga antuk tipat bantal kabaos pamuput pamadikan.
 - b. Risampun puput mapamitan raris sang istri kaajak budal ring pakubon sang lanang saha kalanturang antuk pabiyakalan.
 - c. Mangda puput tumus sakala-niskala raris kulawarga purusa makta pejati ring sanggah/merajan sang wadon.
- 3) Pamargin ngrorod/ngrangkat/nglayat makadi ring sor :
 - a. Reraman sang purusa ngwentenan pejati utawi pangelukuan antuk duta sakirangnya kalih diri, nenten langkung serahina ngawit selang ngrorod sajawaning nglangkungan dura desa/samudra.
 - b. Pagenahan anten tan kengin ring pakubon lanange sadereng mabiyakala.
 - c. Parade tan wenten pamilaku kulawarga sang wadon, patut masadok ring Prajuru sane pacang sareng netesin.
- 4) Pamargin pakrunaan utawi pangelukuan patut :
 - a. Kamanggala antuk geng rena pangempura marep ring reraman sang wadon.
 - b. Kaiguman baos idih-idih utawi kalegayang arep ring pasuakan sang ngidih saha dewasa mawiwaha miwah salanturnya.

- c. Kacihnayang indik kapurusa utawi sentana rajeg kajejerang, kapatut ngidih anak lanang sane kabaos pawiwahan nyeburin, tur risampun sulur pamerasan kategepin kamanggehang sentana nyeburin.
- d. Parade tan katerima pejatine, pakrunaan kamargiang jantos ping tiga.
- e. Kacihnayang pamuput antuk sakala-niskala, kulawarga lanang makta jejamuhan tipat bantal, pejati ring sanggah/marajan sang istri jagi nunas mapamit sakadi dresta sane sampun mamargi.

Pawos 73

Mapitegep santukan wenten saserep rikala wenten wang ngorod :

- 1) Sang sane polih saserep pacang netes pangerorodan patut masadok tur nunas penuntun ring Bendesa Adat utawi Kelihan Dinas.
- 2) Bendesa Adat nureksa netesang saserep punika jati tan jatinya patut polih wirang kulawarga sang ngorod.
- 3) Yening linggihnya polih wirang Bendesa Adat patut gelis nganter saserep puniki ka kubon genah ngorod.
- 4) Sang sane polih saserep patut tinut ring sapituduh Bendesa Adat luire :
 - a. Ngranjing ka kubon inucap tan langkung ring kalih diri.
 - b. Tan kengin makta gegawan, senjata sakeluire ipun.
 - c. Tan kengin matingkah kalih mabaos wak parasia utawi nantang.
- 5) Risampune sami pada napak Bendesa Adat patut nabdabin mangda tata cara panetesan trepti maka pabuat ipun, mangda anak istri sane ngorod jati-jati nerangan idep nyane sabebas ipun.
- 6) Indik pidabdab netesin sang ngorod :
 - a. Anak istri kagenahang ngraga tan dados anak siosan nampekin, sawetara anggen sengker 3 depa tur tinas bebas ring raga.
 - b. Bendesa Adat mabaos pamekas ring sang istri mungguing dane pacang ngicenin pasayuban manut ring idep sang istri, yan pada arsa pangrorode sang maseserep pacang katulak.
 - c. Yening saking papaksaan sang istri kawaliang ring sang wirang utawi sang sane polih saserep.
 - d. Sang lanang patut keaturang ring sang ngwewenang.

Awig – Awig

PALET 2 INDIK NYAPIAN Pawos 74

- 1) Parabian prasida kausan malaki rabi malarapan antuk palas parabian utawi kapademan.
- 2) Wusan maperabian riantukan salah sinunggil seda, mapiteges balu makadi lanang lan balu istri.
- 3) Palas marabian wenten kalih pawos inggih punika : sangkaning pada lila miwah mawiwit wicara.
- 4) Sang ayat palas marabian patut atur sapeksa pailakitan rihin ring sang rumawas (pengadilan negeri), wastu tinas apadangan pamutus baos nyapian, wawu Bendesa Adat nyiarang kawentenannya ring Desa saha keni pamelin kul-kul manut pararem.

Pawos 75

Tata cara palas marabian sakadi ring sor :

- 1) Sulur palas marabian inggih punika:
 - a. Anasar laku.
 - b. Nangken mojar sinanggeh wong purusia.
 - c. Matilar tan pasadok 6 sasih.
 - d. Tan prasida adung malih.
- 2) Yan wicarane katumusang antuk lanangne patut macihna :
 - a. Istri paradara utawi nasur lakunya.
 - b. Istrine amandel sanggama wiadin maambul ambulan jantos 6 sasih.
- 3) Yan wicarane katumusang antuk wadone maka cihna :
 - a. Lanangne drati krama (sang lanang nglaksana tan patut sakadi mapikuren).
 - b. Tan nyenggame saha ngupajiwa istrinyane jantos 6 sasih.
- 4) Parade maka cihna wenten ilakita, bukti lan saksi sang wicara lanang wiadin istri patut digelis silih tunggil wenten panyadoknya.
- 5) Palas marabian sangkaning pada lila :
 - a. Nawur danda wiadin prabea para saksi pada matenge.
 - b. Paguna arta brana polih pahan pada matenge.

Awig – Awig

- c. Pabekel tatadan soang-soang kuasa niri-niri miwah warisan antuk purusa.
 - d. Ngawuruhin miwah pangupajiwaan preti sentana manut swadarmaning Guru Rupaka
 - e. Ngelung jinah boloh kasaksiang antuk Prajuru Banjar miwah Bendesa Adat
- 6) Pamidanda inucap kamargiang antuk Bendesa Adat risampun katiwakin pamutus antuk sang rumaos inggih punika Pengadilan Negeri.

Pawos 76

Parade riwekas sang palas adung malih, manut sakadi ring sor :

- a. Nglaksanayang pawiwahan malih, manut kadi pawiwahan sane patut ring Desa Adat tanjung Bungkak.
- b. Keni pamidanda nikel saking palas rihin riastu pada lila.

Pawos 77

Balu inggih punika parabian sane prasida kausan malarapan antuk sinalih tunggil kapademan.

- 1) Balu manut pawongannya kabineyang dados :
 - a. Balu luh wit sentana rajeg miwah balu luh boya sentana.
 - b. Balu muani kapurusa miwah balu muani nyeburin (boya sentana)
- 2) Swardamaning balu inucap , patut :
 - a. Ngamanggehang pati brata tan kengin ngamargiang paradara utawi droti krama.
 - b. Nguwasayang waris pagunakayaan tan dados ngadol, ngadayang, makidihang lan siosan punika sajawaning kabesang saking pianak utawi kulawarga purusa.
 - c. Kengin ngidih sentana parade wanten pidabdab sadurung sinalih tunggil padem, saha kabebasan antuk kulawarga sinanggeh purusa.
 - d. Kawenangan mawiwaha malih parade sampun polih paigum ring pianak deha truna wiadin kaluarga kapurusa.

Awig – Awig

- 3) Balu ligiran lanang wadon patut polih pangayoman saking kulawarga purusa salami ipun nglaksanayang swadarmaning balu saha ngupapira sakadi sasananing manusa.

Pawos 78

- 1) Balu sinanggeh tan pageh luire :
 - a. Sangkaning malaksana paradara utawi drati krama.
 - b. Matilar saking pakubon tanpa sadok laminnya 6 sasih.
 - c. Lempas ring swadarmaning balu.
 - d. Tan prasida ngasehin solah maprawerti arep ring kulawarga purusa.
- 2) Yening sampun macihna kadi ring ajeng manut Tri Pramana, balu inucap tan polih upon-upon pagunakaya utawi warisan kengin kamulihan dehe truna.
- 3) Parade balu inucap pageh nganutin swadarmaning balu, raris katundung antuk kaluwarga purusa, wenang balu inucap polih pahan gunakaya.

PALET 3

INDIK SENTANA

Pawos 79

- 1) Mungguing sentana wenten kalih soroh luire :
 - a. Preti sentana wiadin sentana rajeg.
 - b. Sentana paperasan.
- 2) Preti sentana inggih punika sentana sane memtu saking pawiwahan nyane sane patut.
- 3) Parade wenten jatma luh tanpa rabi alaki, ngwetuang sentana mangda tan katun keucap astra utawi babinjat, patut kamanggala antuk upacara biyakala pamerascita.
- 4) Parade wenten pawiwahan tan ngametuang sentana, kengin ngidih sentana maduluran antuk upacara lan upasaksi sakala niskala sane sinanggeh sentane paperasan.
- 5) Sentana rajeg inggih punika preti sentana adon (pradana) sane ngamanggehan lanang (purusa) tur risampun nglaksanayang pawiwahan nyeburin (ngidih jatma lanang).

Awig – Awig

- 6) Sentana paperasan mapiteges ngangkat utawi ngidih sentana sane kamanggala antuk sang ngidih kalawan reraman sang kaidih malarapan antuk pahem parembungan saha polih paiguman saking kulawarga miwah kasahan nyane kapatutang antuk Hukum saking Guru Wisesa.
- 7) Sang sane dados kaarsayang sentana rajeg wenten 4 pawos inggih punika :
 - a. Preti sentana wadong nunggal
 - b. Sampun kamanggehang preti sentana lanang (purusa)
 - c. Kapawiwahan kaceburin kautamayang antuk jatma sane maAgama Hindu , yan jatma sane maAgama siosan, patut nglaksanayang pamarisuda raga utawi suda wadani sadurung upacara pawiwahan.
 - d. Sane manggehang sentanaRajeg patut masadok ring Bendesa Adat, Kelihan Banjar tur Kelihan Banjar patut nyiarang ring Banjar, ring Desa olih Prajuru Desa.

Pawos 80

- 1) Ngangkat sentana patut dudonan patut maka cihna arta brana pamerasan saha kasaksiang sakala-niskala.
- 2) Sapasira ugi pacang meres sentana patut masadok dumun ring Bendesa Adat / Banjar Adat sanistane asasih sadurung pamerasan kamargiang.
- 3) Prajuru Adat patut nyiarang ring krama Desa sawewidangan Desa sang sapasira ugi saking sang kulawarga rumaksa tan lila mangda masadok ring Prajuru Desa / Banjar Adat masengker kalih wuku sadurung pamerasan kamargiang pamerasan saking Bendesa Adat.
- 4) Prajuru Desa digelis maosang tur ngicenin pamutus dados tan dados pamerasan punika manut ring Catur Dresta miwah prarem.
- 5) Yening pawongkon sengker punika tan wenten sang tan lila, upacara pamerasan sampun patut kamargiang maduluran antuk upacara kasaksinin sakala niskala.
- 6) Parade sulur pamerasan tan anut kacaping ajeng, Bendesa Adat wenang, tan ngicenin pamargi nglanturin karya pamerasan mangda wicarane kapuputang riin.

Pawos 81

Awig – Awig

- 1) Pamerasan sane kapatut ring Desa sampun maka cihna :
 - a. Widhiwidana pamerasan.
 - b. Kasaksinin antuk Prajuru Desa / Banjar makelingin utawi mailakitayang.
 - c. Kasiarang ring wewidangan Desane.
- 2) Sane patut kaparas anggen sentana makadi ring sor :
 - a. Jatma sane ngamanggehang Agama Hindu.
 - b. Kulawarga prenah saking purusa sang mameras.
 - c. Parade ten wenten kengin saking wadon.
 - d. Yening taler tan wenten, wau dados pada arsa / lila
 - e. Kautamayang saking waris pancer kapurusa.
 - f. Sinalih tunggil mawiwit saking kulawarga tunggal sanggah / merajan, paibon lan dadia.
- 3) Dados ngangkat sentana langkung ring adiri lanang lan wadon.

Pawos 82

Sane kamanggehang dados sentana :

- a. Mangda masolah maprewerti manut swadarmaning putra sesana tumus sakala niskala.
- b. Sang mameras taler mangda maprewerti pateh sakadi pianak padidi saha kaucap pawaris saking sang mameras.

PALET 4

INDIK WARISAN

Pawos 83

- 1) Warisan inggih punika tatamian arta brana saha ayah-ayahan ngupadi sukerta sakala niskala saking kaluhurannya arep ring turunannya.
- 2) Kasinanggeh warisan luirnya :
 - a. Druwe tengah, Karang paumahan, Pamerajan, Pura Sasuhunan.
 - b. Paguna kaya tatadan, jiwa dana, utang piutang.

Awig – Awig

- 3) Wawu kengin kabaos warisan parade wenten :
 - a. Wenten sang mapiturun utawi pawaris.
 - b. Wenten turunannya utawi ahli waris.
 - c. Wenten arta brana, tatengenan, ayah-ayahan maka cihna warisan.

Pawos 84

- 1) Waris Rajeg (Ahli waris) :
 - a. Preti sentana purusa.
 - b. Preti sentana pradana (sentana rajeg)
 - c. Sentana paperasan lanang / wadon
- 2) Parade tan wenten sakadi ring ajeng sang sinanggeh waris rajeg (ahli waris)
 - a. Turunan purusa ngunggahang sakadi rerama misan mindon.
 - b. Turunan purusa polih kasamping, makadi kaponakan misan mindon.

Pawos 85

Swadarmaning ahli waris patut :

- a. Menerima tur ngusahayang nerima pahan saking kaluhurannya makadi; ngremponin tategenan sanggah, pura saha pangupakarannya miwah nyledihinin ayah-ayahan pawaris.
- b. Ngabenan pawaris saha upacara yadnya.
- c. Nawurin utang-utang pawaris manut pangelokita.

Pawos 86

Pangepahan waris manut kadi ring sor :

- 1) Risampun nglaksanayang Pitra Yadnyalan utang-utang pawaris tuntas kataur.
- 2) Para ahli waris polih pahan pada saking paguna kaya sajawaning karang/tegal ayahan sane kaamong antuk ahli waris sinanggeh krama desa ngarep.
- 3) Sinalih tunggil ahli waris ring ajeng tan polih pah-pahan parade :
 - a. Nilar kawitan tan sasamaning Agama Hindu.
 - b. Alapaka Guru wiadin Guru Swadiaya.
 - c. Sentana rajeg kesah mawiwaha miwah nyentana nyeburin soang-soang kabaos ninggal keraton / ninggal kedaton.

- 4) Boya ahli waris kengin muponin hasil manut dudonan luihnya :
 - a. Sentana wadon salami durung kesah mawiwaha utawi alpaka guru raris kaon antuk logika sanggraha mawastu madrue pianak tur yan kaangken antuk wong tuanya, rare inucep kengin ngwaris wantah pagunakayaan wadon inucap kemaon.
 - b. Balu lanang wiadin wadon nyeburin soang-soang boya sentana.
 - c. Mulih deha utawi truna riantukan ring pawiwahane pecak, sampun kebaos ninggal kedaton.
- 5) Pawaris kengin maweweh rikala maurip pinaka jiwa dana, tatadan/bekel maka cihna maweweh tetep ring pianak sane kesah mawiwaha/mapekurenan.

Pawos 87

Parade sajeroning pakulawarga wenten ahli waris langkungan ring adiri patut

:

- a. Kawentenan paigum indik pedoman waris inucap.
- b. Yan tan prasida tunasang tatimbangan ring Prajuru pinaka kertan Desa.
- c. Parade taler tan wenten cumpu ring panepas kerta desa, kengin katumusang ring sang Rumaos (Pengadilan Negeri) .

Pawos 88

- 1) Parade wenten kaputungan utawi nenten wenten ngwaris, Desa wenang nureksa sulur pakulawargan sana dumunan tur nyiarang ring Desa mangda kapatutannya gelis nyelidihin karang inucap.
- 2) Yan parade wates pawenengan 3 sasih sasampun kasiarang ring soang-soang banjar, ten wenten kaluwarga sane nyelidihin, karang inucap wenang kedaud antuk Desa maka serana upakara pangeruwakan manut drestamiwah pararam saha maretaka pitra yadnya sang lina pecak ngamong karang inucap.

Awig – Awig

SARGA VI WICARA LAN PAMIDANDA

PALET 1 INDIK WICARA

Pawos 89

- 1) Sane wenang maosin makadi mutusang wicara ring Desa inggih punika Prajuru / Bendesa Adat sinanggeh Kerta Desa.
- 2) Parade sang wicara tan wenten cumpu ring pamutus kerta Desa kangin nunansang wicara inucap ring Sang Rumaos (Pengadilan Negeri).

Pawos 90

- 1) Sahanan wicara mawiwit kacorahan saluire sinanggeh nungkasin daging awig-awig, pesuara miwah pararem, Prajuru/Bendesa Adat patut digelis maosin tan nyantos pasadok.
- 2) Sajaba wicara kadi ring ajeng, patut ngantosin pasadok sang nunas baos.
- 3) Panepase patut pastika nyantenan iwang patut malarapan Tri Pramana (Saksi, Ilakita, Bukti) miwah tan maren nepak ring Catur Dresta.

Pawos 91

- 1) Ritatkala Desa nampi karya, wenten sinalih tunggil krama Desa tan tedun ngayah taler tan wenten pasadok/papuwangkidan ping 3 tan wenten paselatnya kabaos “NGERANGIN”
- 2) Yan wenten sinalih tunggil krama Desa nglengit ritatkala makarya miwah ring pasangkepan taler kabaos “NGERANGIN”
- 3) Yan wenten sinalih tunggil krama desa ngadog-ngada ring pakaryan miwah ngaryanan gora ring pasangkepan taler sampun mawanti-wanti kagelemekan jatma punika galak tur nantangin sawireh :
 - a. Andel teken kawikanannya.
 - b. Andel teken kasugihannya.
 - c. Andel teken akeh madrue kadung braya.
 - d. Andel teken kaprawiran.

Niki patut kabaos “PUNGGUNG”

Awig – Awig

- 4) Yan wenten sinalih tunggil krama Desa maosang indik Desa sane boya-boya , maosang indik Prajuru sane boya-boya, puniki kabaos “KECAMIL”
- 5) Yan wenten sinalih tunggil krama Desa purun ring Agama niki kabaos “DURACARA”

Pawos 92

Sakeluring pabuatan kadi ring ajeng inggih punika ngrangin, punggung, kacamil lan duracara patut pamasihnya kabudalan.

PALET 2

INDIK PAMIDANDA

Pawos 93

- 1) Sakeluire pakaryan Desa madaging pamidanda/dedosan.
- 2) Desa wenang niwakin pamidanda ring warga Desa sane sisip. Paniwakan inucap kalaksanayang antuk Prajuru miwah ring pesamuhan.
- 3) Pidanda sane katiwakan mangda pastika ring Catur Naya Sandi luire :
 - a) Sama : krama utawi Prajuru sami keni pamidanda
 - b) Beda : paniwakan pamidanda wenang maninayang manut sor singgih kasisipan.
 - c) Dana : pamidanda kalaksanayang madasar antuk pikayun tresna asih.
 - d) Danda : laksana utawi tatujon wantah mralina kasisipan utawi mapitulung ngamanggehang kasudamalan Desa.
- 4) Pawosan pamidanda luire :
 - a) Dedosan antuk arta.
 - b) Panebus kasisipan antuk arta.
 - c) Upakara antuk banten.
 - d) Sapa sumaba (kasepekang) ring Desa.
 - e) Kabancutin , kagurahin , kasekung.
 - f) Kesah katundung, kapalasang.
 - g) Nunas geng pangermpura ring Desa.
- 5) Jinah utawi arta brana pamidanda ngranjing dados druen Desa.
- 6) Yan wenten sinalih tunggil krama Desa nglengit bobotan aji aketeng kadanda dados 3 keteng.

Awig – Awig

- 7) Yan wenten sinalih tunggil krama pamasihnya kabudalan, yan jantos nginep awengi kadanda 250 keteng bolong, yan 2 wengi kadanda 450 keteng bolong, yening 3 wengi kadanda 650 keteng bolong, yening jantos 4 wengi taler tan wenten pangetutnya, kadanda daods 4.900 keteng bolong tur ten wenang baosang malih, puniki patut sampun kausan makrama Desa.
- 8) Kengin dados tedun makrama Desa malih :
 - a) Nunas bawos ring krama Desa.
 - b) Mangda ngrauhin ring saong-soang paumahan jaga nunas baos.
 - c) Nginu Desa antuk canang, base tur bebanten cane lan pejati.
 - d) Nunas pangampura tur kaiwangan.
 - e) Naur pamidanda.
 - f) Salami 5 warsa tan dados kasudi/dipilih anggen Prajuru Desa.
- 9) Yening wenten sinalih tunggil krama desa durung muputang wicarane kadi ring ajeng, diparade wenten labuh bang/kelayu sekar :
 - a) Tan dados mendem ring Setran Desa.
 - b) Agung alit karya yadnyan ipun, tan katerima ring Banjar utawi Desa.
 - c) Krama Banjar/Desa tan kawenangin ngremba karyan ipun, yan wenten sinalih tunggil krama Desa ngremba karyan ipun patut keni danda manut pararem.
- 10) Yan hana wong mamurug sepat iki, wenang kawastonin ring Bhatara Sanga, dadi katemah ring Bhatara Guru luire nemahe Jahtesemat, mati sinambering sawung, mati sinambering sesapi, mati sinamberin karebek, mati sinambering kilat, mati sinambering gajub, mati sinambering buaya, mati sinambering/sinototing mong, mati sinototing ula, mati anak-anaknya, nati labuh lur, mati labuh geni, lare keneng sambat, salah ton, salah ujar, apan kawaston nira ring Bhatara Guru katemah denira Bhatara Nawa Sanga.

SARGA VII

NGUWAH NGUWUHIN AWIG-AWIG

Pawos 94

- 1) Nguwah-nguwuhin Awig-Awig Desa puniki kalaksanayang antuk Paruman Desa.
- 2) Paruman inucap mangda kadasrin antuk pakarsan krama Desa.

Awig – Awig

- 3) Pamuput baos kadasarin antuk sagalak segilik seguluk selunglung baya sabayantaka.

Pawos 95

Paruman indik nguwah-nguwuhin Awig-awig kadi ring ajeng, kengin kamedalin antuk soang-soang krama, Prajuru Banjar, Prajuru Desa, silih tunggil babaosan punika kaputusan antuk suara pinih akeh.

SARGA VIII

PAMUPUT

Pawos 96

- 1) Awig-awig puniki kawastanin “AWIG-AWIG DESA ADAT TANJUNG BUNGKAK” .
- 2) Awig-awig puniki kamargiang ngawit kararemin.

Pawos 97

- 1) Sakeluire sane wenten saderengnya, patut kanutang ring sadaging awig-awig puniki.
- 2) Sakeluire sane durung kabaos ring awig-awig puniki, minakadi pasuara-pasuara patut kalaksanayang manut tata cara sane ketah mamargi kadulurin antuk pararem.

Pawos 98

- 1) Awig-awig puniki kararemin duk rahine : Redite Wage Wuku Krulut Penanggal ping 15 (Purnama) Sasih Kanem Jenku warsa 1912 tanggal Masehi 2 Desember 1990.
- 2) Awig-awig puniki kalinggatanganin antuk :
 - a) Kelihan-kelihan Banjar sawewidangan Desa Adat Tanjung Bungkak.
 - b) Bendesa Adat.Kasaksinin olih Kepala Dusun, Kelihan Banjar sawewidangan Desa Adat Tanjung Bungkak miwah Kepala Desa.
- 3) Luir palingga tangan

Awig – Awig

Kapertama
Prajuru Desa Adat Tanjung Bungkak

Bendesa Adat,

Penyarikan,

(I Made Weter)

(I Ketut Winda)

Kaping Kalih
Kelihan Banjar Sukaduka Sawewidangan Desa Adat Tanjung Bungkak

**Prajuru
Banjar Sebudi,**

Kelihan,

Penyarikan,

(I Wayan Mertha)

(I Nengah Budi)

**Prajuru
Banjar Tanjung Bungkak Kelod,**

Kelihan,

Penyarikan,

(I Ketut Gelis)

(I Wayan Sukarja)

**Prajuru
Banjar Tanjung Bungkak Kaja,**

Kelihan,

Penyarikan,

(I Ketut Suteja)

(I Gede Pretama)